



Inatsisartunut ilaasortaq Kristian Jeremiassen
Inuit Ataqaatigiit
inatsisartut@inatsisartut.gl

Aasianni inissianik amigaateqarneq pillugu § 37 naapertorlugu apeqquteqaammut 2022-178-imut akissut

26-09-2022

Suliaq nr.: 2022 - 17903

Id. nr. 80159379

Asasara Kristian

Inatsisartut suleriaasianni § 37 naapertorlugu Aasianni inissianik amigaateqarneq pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909

3900 Nuuk

Tif.: (+299) 34 50 00

E-mail: box909@nanoq.gl

www.naalakkersuisut.gl

Apeqqut 1 – Aasianni inuusuttunut inissialiornissamut Naalakkersuisut pileraaruteqarpat?

AKISSUT: 2022-mut Aningaasanut Inatsimmi, kontop pingaernerup 89.72.12 Inissialiassat taartissanillu inissialiortiterneq ataani allassimavoq, suliassamut nr. 32.142 Inuusuttunut inissiat, Tasiilaq, suliassamut nr. 32.143 Inuusuttunut inissiat, Upernavik, suliassamut nr. 32.144 Inuusuttunut inissiat, Qasigianguit, suliassamut nr. 32.145 Inuusuttunut inissiat, Uummannaq, suliassamut nr. 32.146 Inuusuttunut inissiat, Kangaatsiaq, suliassamut nr. 32.147 Inuusuttunut inissiat, Ittoqqortoormiit aningaasanik immikkoortitsisoqarsimasoq.

Apeqqut 2 – Pileraaruteqartoqarpat qaqugu sananeqarnissaa pileraarutigneqarpa?

AKISSUT: Suliassanut tamanut immikkut piffissamut pileraarutissatut naatsorsuutigineqartut 2022-mut Aningaasanut Inatsimmi kontop pingaernerup 89.72.12 Inissialiassat taartissanillu inissialiortiterneq ataani allassimapput.

Tassunga tunngatillugu ilisimatitsissutigisinnaavara, Upernavimmi inuusuttunut inissiat ataaseq + pingasut, Qasigianguani inuusuttunut inissiat sisamat aamma Tasiilami inuusuttunut inissiat sisamat + sisamat suliariumannittussarsiuunneqareermata. Upernavimmi suliassamut akit isumaqatigiissusiornissarlu pillugit isumaqatiginninniarnarit ingerlapput, taamatullu Qasigianguani Tasiilamilu isumaqatiginninniarnarit tassunga assingusut aallartinneqartussaassapput.

Isumaqatiginninniarnarni akit akuersaarneqarsinnaasut anguneqarsinnaappata, inuusuttunut inissiat imatut atulernissaat naatsorsuutigineqarpoq: Upernavimmi 2024-mi decembarip aallartinnerani, Qasigianguani 2024-mi novembarip aallartinnerani aamma Tasiilami 2024-mi februaarip aallartinnerani.

Apeqqut 3 – Aasianni inissarsiortut qanoq amerlatingippat?

AKISSUT: INI A/S ilisimatitsivoq, Aasianni inissarsiortut 204-usut, taakkunanngalu 18-it aamma 35-t akornanni ukiullit 95-iusut. Tamatuma peqatigisaanik INI ilisimatitsivoq,

2022-mi qaammatit pingasut siulliit ingerlaneriniilli utaqquisut allattorsimaffianni allatsissimasut 70-it sinnerlugit amerleriarsimasut. Kisitsisit taakku INI A/S-ip nittartagaani takuneqarsinnaapput.

Nittartakkami allassimavoq, 31. marsi 2022 aallarnerfigalugu Aasianni inissiamut utaqqisarneq agguaqatigiissillugu qaammatinut aqqanilinnut naatsorsorneqarsimasoq.

Apeqqut 4 – Aasianni inuusuttut 18-it 35-illu akornanni ukiullit qassit inissarsiorpat?

AKISSUT: Apeqqut nr. 3-mut akissut takuuk.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Erik Jensen